

Kalaallit Nunaanni filmiørnermik ingerlatsineq qanoq nukittorsarneqarsinnaanersoq pillugu Naalakkersuisut suleqatigiissitamik pilersitseqquneqarnissaannik Inatsisartut aalajangiiffigisassaattut siunnersuut. Naalakkersuisut sapinngisamik suleqatigiissitami susassaqtut akuutissavaat. Innersuussutit UPA 2023-mi saqqummiunneqassapput.
(Inatsisartunut ilaasortaq, Nivi Olsen, Demokraatit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Nivi Olsen, Demokraatit, Inatsisartut aalajangiiffigisassaattut siunnersuummik saqqummiussaqqarmat qutsavigaara.

Naalakkersuisut isumaqataapput, nunatsinni filmiørnermik ingerlataqarneq nukittorsarneqartariaqartoq. Taamaattumik Naalakkersuisunit siunnersuut ilalernartipparput.

Eqqorpoq filmiørnermut tapiissutit maanna Eqqumiitsuliornermut Aningaasaateqarfiup (Kunsthondenip) ataaniilernikuusut, eqqumiitsulioriaatsinillu allanit unammillertussanngortutut isikkoqarluni, tassa ataatsimut aningaasaliussat eqqumiitsulioriaatsinut arlalinnut avinneqartussanngormata.

Taamaakkaluartoq ilisimatitsissutigineqarsinnaavoq, filmiørnermik ingerlataqarneq eqqumiitsulioriaatsinut allanut naligiissinneqassasoq aammalu tapiissutit qanoq agguarneqassanersut Eqqumiitsuliornermut Aningaasaateqarfiup siulersuisuinit aalajangerneqartassasoq.

Filmiornermik ingerlataqartut Rigsfællesskabspuljen Norddok II-mit tapiissutinik qinnuteqarsinnaanngoqqissimapput, taanna siusinnerusukkut aningaasaliissutigineqarsimasunit nangitsinerulluni. Naalagaaffeqatigiinneq pillugu ilisimasat siammarterniarlugit aammalu Kalaallit Nunaani Savalimmiunilu filmiørnermut piginnaasanik suleqatigiinnillu pilersitsineq anguniarlugu piffissami 2022-mit 2024-mut Kalaallit Nunaat, Savalimmiut Danmarkilu pillugit piviusulersaarutitut tapiissutinut atugassanngorlugit Det Danske Filminstitut 2021-mi aningaasanut inatsisitigut 27,1 mio. kr.-nik aningaasaliiffigineqarpoq.

Taamaammatt filmiørnermik ingerlataqartut sulianut ilinniarnissamullu tapiissutinik qinnuteqarsinnaanermittut periarfissaqarnerulersimapput.

2022-p ukiaanerani kulturi pillugu isumasioqatigiittoqassaaq. Filmiornermut ingerlataqartut tassunga aamma qaaqquneqassapput, ingerlataqartullu ilisimasatik aallaavigalugit Kalaallit Nunaanni filmiørnermut ingerlataqarneq qanoq nukittorsarneqarsinnaanersoq pillugu saqqummiussaqqarsinnaassallutik. Naalakkersuisut naatsorsuutigaat, isumasioqatigiinneq suleqatigiissitamut pingaaruteqartunik immersuissasoq.

Naalakkersuisut taamatut oqaaseqarlutik siunnersuut akuerineqassasoq inassutigaa.